

COLOSENSES

Saludo

1 ¹Núa Pablo, abéeri Jesucristo yàasu apóstol, Jesucristo ibànuèrica nucàlidacaténá Jesucristo iináwaná ìwali wenàiwicanáí irí càide iyúwa Dios iwàwáaná. Nubànùacué pirí cuyàluta. Yáí wéenasàiri Timoteo yeebáidéerica Jesucristo itàacáí ìyaca núapicha, iwàwalicuéca pía nacáí. ²Nutànàacué pirí cuyàluta píacué wéenanáica, Dios yàasu wenàiwicaca ìyeyéica Colosas ìyacàlená iricu yeebáidéeyéica Cristo itàacáí tàì ímèeri iyú. Nusutácué Wáaniri Dios ícha pirípinácué imànínápinácué pirí cayábèeri mawèníri iyú, imàacáanápinácué pìyaca matuíbanáiri iyú nacáí.

La oración de Pablo por los creyentes

³Macáí imanùbaca wasutácaalí Wáaniri Dios ícha pirípinácué, yáí Wáiwacali Jesucristo Yáanirica, yá wàaca irí cayábèeri pìwalicué. ⁴Wadéca wémìacuéca piináwaná ìwali peebáidacuéca Cristo Jesús itàacáí, cáininácué nacáí piicáca macáita Dios yàasu wenàiwica yeebáidéeyéica Cristo Jesús itàacáí. ⁵Píalimácuéca cáinináca piicáca nía píalíacáinácuéwa pìyáanápiná chènuniré Dios yáapicha casímáiri iyú. Pidécuéca pidàbaca picùaca pìyáanápinácué néré péemíacáinaté yáí báisíiri tàacáisi cayábèerica icàlidéerica Jesucristo iwàwaca iwasàacuéca pía Dios yàasu yùuwichàacáisi ícha. Yáté peebáidacuécani. ⁶Yáí báisíiri tàacáisica áibanáí icàlidéericatécué pirí, idéca manùbéeyéi yéemíacani, yá neebáidacani macáí cáli ínata. Yá macáí wenàiwica íiwitáaná nèewi nàyaca abénaméeyéi yeebáidéeyéica yáí tàacáisi càide iyúwacué peebáidáaná, bàaluitécáiná péemíacuéca cáinináca Dios iicácuéca pía báisíiri iyú. ⁷Wéenasàiri cáininéerica

waicáca ípidenéerica Epafras, yéewáidacatécué pía báisiiri tàacáisi iyú. Yái Epafras íbaidaca Dios irípiná wáapicha. Yá siúcade Epafras íbaidaca mamáalàacata Cristo irípiná cachàiniíri iyú. ⁸Epafras idéca icàlidacuéca walí piináwaná ìwali. Icàlidaca walí Espíritu Santo idéca ichàiniadacuéca pía cáininácaténácué piicáca wenàiwica yeebáidéeyéica Jesucristo itàacái.

⁹Inaté wéemiàcanacáitacué piináwaná ìwali, yá càmita wayamáida wasutáca Dios ícha pirípinácué imàacáanápínácué pialíacawa càinácaalícué iwàwáaná pimànica, imàacáanápíná nacái cáalíacáicuéca pía, cáiwitáisecaténá nacái pialíacaténácuéwa cayábéeri ìwali báawéeri íchaná. ¹⁰Dios imànicaalícué piri càì, yásí pialimácué pìyaca càide iyúwa iwàwacutáaná Wáiwacali yàasu wenàiwica imànica, pimànicaténácué mamáalàacata cayábéeri càide iyúwa Wáiwacali iwàwáaná wamànica, pimànicaténácué píibaidacaléwa macái cayábéeri íiwitáaná Dios irípiná idècunitàacá pialíacuécawa Dios ìwali cayábéeri iyú cachàiniíwanái mamáalàacata. ¹¹Wasutácué Dios ícha nacái pirípinácué ichàiniadáanápínácué pía íiwitáise chènuníiséeri iyúwa, yái icànéerica mèlumèluíri iyú. Càitacué pialimá píideniaca macái wawási matuíbanáita, tàì íiméeri iyú nacái. ¹²Càita nacái pialimácué pìaca Wáaniri Dios irí cayábéeri casíimáiri iyú, yái màulenéericuéca imànica pía cayábéeri iyú, piácué yeebáidéeyéica Jesucristo itàacái, peedácaténácué piriíwa yái cawènírica Dios yèeripináca yàasu wenàiwicanái iríwa Dios ìyacàle cacamaléeri írìcu. ¹³Dios idéca iwasàaca wía Satanás íiwitáise catéeri ícha, íná càmita quirínama Satanás idacùa wáiwitáise; Dios idéca imàacaca liriwa icùanápíná wía, yái lírica cáininéerica Dios iicáca. ¹⁴Yái Dios lírica yéetácatéwa wáichawalíná, ipíchaná Dios yùuwichàidaca wía wabáyawaná ìwalísewa. Càita Dios líri idéca iwasàaca wía íiraná iyúwa Dios yàasu yùuwichàacáisi ícha. Iná Dios imàacaca iwàwawa wabáyawaná ícha, wía yeebáidéeyéica Dios líri itàacái.

La paz con Dios por medio de la muerte de Cristo

¹⁵Càmita wáalimá waicáca Dios watuí iyúwa, quéwa yái Cristo, yácata Dios yéenáiwaná wáaliméerica waicáca. Yácata Dios lírica, ìyéericaté ipíchawáiseté idàbacawa macáita yái ìyéerica. ¹⁶Dios imàacacaté líri idàbaca macáita yái ìyéerica, macáita ìyéerica capíraléeri cáli íinata, cháì èeri írìcu nacái. Idàbacaté macáita yái waiquéerica, yá nacái càníricáwa wáalimá waicáca. Dios líri idàbacaté macáita ángelnái

icuèyéica yàasu cáliwa chènuníiséeyéi. Dios Iiri idàbacaté irípináwa macáita yáí iyéerica. ¹⁷Cristo ìyacaté macáí wawàsi ipíchawáise, yá siùca Cristo icùaca macáita namànicaténá càide iyúwa iwàwacutáaná namànica. ¹⁸Cristo nacáí icùaca wía, ichùuliaca wía nacáí, wía yeebáidéeyéica itàacáí. Càide iyúwa wenàiwica íiwitáise ichùullianá iináwa, càita nacáí wáiwitaca yáí Cristoca, wíacáiná càica wíade iyúwa Cristo iiná cháí èeri irícu. Cristoca yáí yèerica macáí wawàsi icáuca, imàacacaté nacáí weebáidaca itàacáí. Yácata yáí idàbáanéericaté imichàacawa yéetácáisi íicha. Iná Cristo icùaca macáí wawàsi, cachàinicáiná íiwitáise, manuírí íiwitáise nacáí náicha macáita yáí wawàsica Cristo imàníiricaté. ¹⁹Dios íináidacatéwa iwàwáaná íiwitáise manuírí ìyaca Cristo iwàwalicu máiní manuísíwata. ²⁰Dios iwàwacaté nacáí Cristo yéetácawa wáichawalíná cruz ìwali, ipíchaná wàuwichàacawa Dios yàasu yùuwichàacáisi iyú wabáyawaná ìwalísewa. Yáté Cristo íiraná imusúacatéwa íicha cruz ìwali. Càité Dios iwàwaca imànica yéewacaténá cayábaca iicáca macáí wawàsi, níái macáita ìyéeyéica cháí èeri irícu, nía nacáí ìyéeyéica chènuníiséeri cáli íinata.

²¹Quéechatécáwa càmitacué Dios yàasu wenàiwica pía, iyúwa canéeyéi yàasu cáli. Bàaluité Dios yùuwidecuéca pía manuísíwata, pimànicáináitécué pibáyawanáwa. ²²Quéwacué Dios idéca cayábaca iicácuéca píiwitáise imàacacáináité iwàwawa pibáyawaná íicha, Cristo yùuwichàacáináité yéetácáisi iiná yáapichawa, yáí iiná èeri irícuírca. Dios idéca càì imànicuéca pirí itécaténácué pía ibàlùadánápinácué pía íipunitawa, masaquéeyéipiná íiwitáise, mabáyawanéeri iyú nacáí. ²³Quéwa piwàwacaalícué pìyaca Dios yáapicha, iwàwacutácué peebáidaca Jesucristo itàacáí tàì íiméeri iyú mamáalàacata. Picácué piméyáa picùaca Jesucristo iwasàanápíná píawa Dios yàasu yùuwichàacáisi íicha, néese peebáidacué mamáalàacata càide iyúwa nacàlidáanátécué pirí cayábéeri tàacáisi. Yácata tàacáisi madécaná wenàiwica íiwitáaná yéemièrica macáí cáli íinata. Núa nacáí Pablo, nudéca nucàlidaca wenàiwicanáí iríni.

Pablo encargado de servir a la iglesia

²⁴Siùca casíimáica nuwàwa nùuwichàacawa cháí presoíyéi ibànalicu ìwalíse yáí nucàlidáanácuéca pirí Jesucristo iináwaná, madécaná áibanáí wenàiwica irí nacáí, nuwàwacáiná núasáidaca áibanáí irí càinácaalíté Cristo yùuwichàanáwa náichawalíná imàacacaténá yàasu wenàiwicaca nía, cawinácaalí yeebáidéeyéica itàacáí, ìyéeyéipiná

càiwade iyúwa Cristo iiná ìyéerica cháí èeri irícu. ²⁵Dios idéca ichùulìaca nuíбайдáanápínacué pirí, píacué yeebáidéeyéica Jesucristo itàacái, nuyúudàacaténacué pía. Dios ichùulìacaté núa nucàlìdàanápíná itàacái wenàiwicanái irí, quéwa iwàwacutáca nucàlìdaca itàacái macáita, àta yái tàacáisi Dios ibèericaté wenàiwicanái fícha. ²⁶Bàaluitésíwa, èeri ipíchawáiseté, néenialíté Dios ibàacaté yái tàacáisi macái ángelnái fícha. Néeseté idécanáami idàbaca wenàiwicanái, yáté ibàaca náichani nacái, yái tàacáisica. Iná madécaná mil camuí Dios idàbacatáiseté èeri àta siùca nacáide, idéca ibàaca yái tàacáisica wenàiwicanái fícha. Quéwa siùca Dios imàacaca yàasu wenàiwicanái yáalíacawa ìwali. ²⁷Píacué cà míiyéica judío, Dios iwàwacatécué imàacaca píalíacawa ìwali yái tàacáisi máiníiri cayábaca, máiníiri nacái cawènica, Dios ibèericaté áibanái fícha. Yácata yái tàacáisica: Dios idéca imàacacué Cristo iyaca piwàwalicu, píalíacaténacuéwa pìyáanápíná chènuniré Dios yáapicha, cáimiétacanéeri iyú, mèlumèlúiripíná picamalá yáapichawa.

²⁸Wía apóstolca, wacàlìdaca Cristo itàacái wenàiwicanái irí. Wàalàaca nía éeréeri iyú macái wenàiwica íiwitáaná. Wéewáida nacái macái wenàiwicanái macáita Dios yáalíacái iyú náalíacaténá néemiaca cayábani, càinácaalí íimáaná wawàwacáiná wabàlùadaca nía Dios íipunita cachàiníiyéi íiwitáise Cristo ìwali. ²⁹Iná nuíбайдaca Dios irípiná cachàiníiri iyú macái nuchàini iyúwa, yái chàinisi Cristo imàaquéerica nulí.

2 ¹Nuwàwacué píalíacawa nusutacué Dios fícha pirípiná manuísíwata, píacué Colosas iyacàlená mìnanáica. Càita nacái nusutáca Dios fícha nalípiná níara Laodicea iyacàlená mìnanáica, macáita nacái yeebáidéeyéica Jesucristo itàacái, cà míiyéicáwa iicá núa. ²Nusutacué Dios fícha pirípiná canánama Dios ichàiniadàanápínacué piwàwa, yéewanápíná nacái cáinináca piicáyacacawa abédanamata. Nusutacué Dios fícha nacái imàacáanápínacué píalíacawa manuísíwata Cristo ìwali. Yái Jesucristoca, yácata tàacáisi Dios ibèericaté wenàiwicanái fícha, quéwa siùca Dios imàacaca wáalíacawa Jesucristo ìwali. ³Dios iwàwa wáalíacawa Cristo ìwali, yácáiná Cristo idèniaca macáisíwata Dios yáalíacái, máini cayábéerica. Iná wáalíacaalíwa Cristo ìwali, yásí imàaca wáalíacawa macái wawàsi ìwali Dios iwàwéerica wáalíacawa ìwali. ⁴Núumacué pirí càì ipíchánacué nachìwáidaca pía cachìwéeri tàacáisi iyú casímáirica wenàiwicanái yéemiaca, níái cà míiyéica yáalíaca Dios ìwali. ⁵Ewitacué canácáaníta núa píapicha siùca, càicáanítacué nuwàwali pía mamáalàacata càide iyúwa nùyaca nacáicaalícué píapicha.

Yá casímáica nuwàwa nuémìacué piináwaná ìwali abédanamacué píiwitáise píapichawáaca pìyacaténacué machacàníiri iyú Dios iicápiná, peebáidáanacué nacái Cristo itàacái tàì íiméeri iyú.

La nueva vida en Cristo

⁶Pidécuéca peebáidaca Wáiwacali Jesucristo iwasàanápínacué pía Dios yàasu yùuwichàacáisi íicha, íná iwàwacutácué pìyaca abédanamata Wáiwacali yáapicha. ⁷Càide iyúwa manuíri àicu ipìchu ibàlùacaalíwa depuíwalé cáli iricu, yá canácata yáaliméeri iwataacani, càita nacái iwàwacutácué peebáidaca Jesucristo itàacái mamáalàacata tàì íiméeri iyú càide iyúwatécué néewáidáaná pía. Pìacué nacái cayábéeri Dios írí mamáalàacata.

⁸Piicácué píchawa cayába ipíchanácué áibanái iwènúadacuéca píiwitáise báisiiri tàacáisi íicha nawàwacáiná nachìwáidacuéca pía nàasu cachìwéeri tàacáisi iyúwa. Càmita nacàlida Cristo itàacái, càmita nacái Cristo iyúudàa nía. Néese nacàlidacáita meedá càide iyúwa èeri mìnánái íiwitáise íimáaná, yá nacái nàawirináimi yàasu tàacáisica. Nacàlida nacái demonionái yàasu tàacáisi, níara demonio ichùulièyéica èeri mìnánái íiwitáise namànicaténá nabáyawanáwa.

⁹Picácué péemì cachìwéeyéi írí yácáiná yái Cristoca, yácata abéerita wenàiwica idènièrica macáita Dios íiwitáise cachàiníiri manuísíwata. ¹⁰Dios íiwitáise cachàiníiri idéca ipuníadacuéca piwàwa pìyacáinacué abédanamata Cristo yáapicha, yái Cristo ichùulìèrica macái ángelnái íiwitáaná, demonionái nacái, macáita icuèyéica yàasu cáliwa chènuníiséeyéi, cháì èeri iricu nacái. Iná cachàinírìca náicha canánama yái Cristoca. ¹¹Péemìacué comparación: Dios ichùullàcaté judionái namàníinápínaté circuncisión néenibe asíanái íríwa nawàwalicaténaté Dios yàasunáica nía. Yái circuncisión íimáanáca càicanide iyúwa Dios idéca nacáicaalí idalúaca náicha náiwitáise cabáyawanéeri. Càité Dios iwàwaca judionái imànica àta Cristo yàanàacatalétaté. Siùca pìyacáinacué abédanamata Cristo yáapicha, íná Cristo idéca ichuìdacuéca píicha píiwitáise cabáyawanéeri càide iyúwa idéca nacáicaalí idalúacuéca píicha báawéeri. Càitacué Cristo yáasáidaca yàasu wenàiwicaca pía. ¹²Càita nacái íimáaná yái pibautízàanácucawa: Quééchatécué pìricùacaalítéwa úni yáaculé, yá píasáidacatécué Cristo idéca ichuìdacuéca pibáyawaná machawàacacaténacué pibáyawaná iyúwa yéetéerimiwa. Iná càicatécué píade iyúwa yéetéeyéimiwa Cristo yáapicha càiculìi iricu, pìricùacaalítécuéwa úni yáaculé. Néese

pimichàacaalítécuéwa úni yáacuise, yáté píasáidacuéca pidàbacaté pìyaca picáuca wàlisài yáapichawa càide iyúwa pidéca nacáicaalcué pimichàacawa yéetácáisi íicha Cristo yáapicha, peebáidacáinaté cachàiníríca Dios íiwitáise, yái imichàidéericaté Cristo yéetácáisi íicha. ¹³Bàaluité càicuéca píiwitáise iyúwa yéetéeyéimiwa, pimànicáinatécué pibáyawanáwa. Ináté càmítacué píalimá pimànica cayábéeri càide iyúwa yéetéerimiwa càminá yáalimá imànica cayábéeri, píiwitáise cabáyawanéeri idacùacáinatécué pía. Quéwa Dios idéca cáuca imànicuéca píiwitáise pìyacáinacué abédanamata Cristo yáapicha. Dios idéca imàacaca iwàwawa macáita wabáyawaná íicha, ìwalíise yái Cristo yéetáanácawa wáichawalíná. ¹⁴Bàaluité càmíta wamàni càide iyúwaté Dios ichùulianá wamànica imàacacaalíté itàacáiwa profeta Moisés írí. Ináté yái tàacáisi icháawàacaté waináwaná ìwali. Dios itàacái íimacaté iwàwacutáanaté wàuwichàacawa wabáyawaná ichùuliacawa. Yái yùuwichàacáisica càicanide iyúwa wamawèniacále manuírí iwàwacutéerica wapáyaidaca wáichawa càiripináta càmícáinaté wáalimá wamànica macáita machacànírí iyú càide iyúwa Dios itàacái íimáaná. Quéwa Dios idéca imáalàidaca wáicha yái wamawèniacáleca imàacacáinaté iwàwawa wabáyawaná íicha Cristo yéetácáinatéwa cruz ìwali wáichawalíná. Iná càmíta iwàwacutá wàuwichàacawa càiripináta wabáyawaná ichùuliacawa. Dios idéca iwàsàaca wía íicha. ¹⁵Cristo yéetácáinatéwa cruz ìwali wáichawalíná, yáté Dios imawèniadaca demonionái ichàini, níara demonio íiwacanánáica ichùulièyéica èeri mìnánái íiwitáise. Yá Dios ibáiniadaca nía macàaluínináta macái chènuníiséeyéi íicápiná. Yá nacái Dios imàacaca Cristo itéca yáamísewa demonio íiwacanánái presoírí iyú, càide iyúwa cachàinírí úwi íiwacaliná itécaalí yáamísewa yùuwidenáiwa idécanáami úwi íiwacaliná imawèniadaca nía.

Busquen las cosas que son del cielo

¹⁶Iná càmítacué iwàwacutá péemìaca nalí níara áibanái icháawèyéica piináwaná ìwali pìyáacalé ìwalíisewa, ìwalíise nacái yái càmináicuéca pimàni judíonái yàasu manuírí culto macái camuí imanùbaca, macái quéeri imanùbaca nacái, macái semana imanùbaca nacái, sábadò irícu, judíonái iyamáidacatáicawa. ¹⁷Bàaluité Dios ichùuliacaté israelitanái namànínápinaté macáita yái wawàsica nánáidacaténátéwa ìwali nacuèrinápináca Dios ibànueripinaté nalí, yái Cristoca. Quéwa Cristo yàanàacaté aléi èeri írìculé, íná càmíta iwàwacutá wamànica wàacawa

quirínama yái wawàsica iyúwa áibanái cachìwéeyéi náimáanacué pírí siùca. ¹⁸Péemìacaalícué cachìwéeyéi irí, yásí nachìwáidacué píawa; picácué péemia nacháawàaná piináwaná ìwali. Càita nacàlidaca nèepunicawa nàasu tàacáisi cachìwéeriwa: Náimaca iwàwacutáanása wàyaca máini catúulécanéeri iyú, wamàacáanása nacái wáichawa wayáacaléwa cayábáanápínása Dios iicáca wía. Náimaca nacái iwàwacutáanása wàaca ángelnái icàaluíniná, wasutáanása náicha wawàsi natàanínápiná wawicáu Dios yáapicha, cachìwéeyéi fimacáiná càmítasa Dios iwàwa yéemìaca wasutáaná íicha. Nacàlidaca nachìwawa nacái naicácasa yéenáiwánási nacáiri Dios néeséeri. Yá nacái máini cáimacáica naicáca níawawa manuísíwata náiwitáise èeri irícuíri ìwalísewa. ¹⁹Càmíta nàya abédanamata Cristo yáapicha, yái icuèrica wía, wía yeebáidéeyéica Cristo itàacái. Cristo ichùullíaca wía càide iyúwa wenàiwica íiwitáise ichùullíaná iináwa, wíacáiná càica wíade iyúwa Cristo iiná iyéerica cháí èeri irícu. Cristo ichàiniadaca wawàwa, imàacacué nacái abédanamata wáiwitáise wáapichawáaca wamànicaténá càide iyúwa Dios iwàwáaná.

²⁰Piyacáinácué abédanamata Cristo yáapicha, yái yéetéericatéwa píichawalínácué, íná yéewa càicuéca píade iyúwa wenàiwica yéetéericatéwa Cristo yáapicha demonionái íicha, níara demonio ichùulliyéica èeri mìnánái íiwitáise. Iná càmítacué quirínama iwàwacutá pìyaca càide iyúwa èeri mìnánái íiwitáise iyáaná. Càmítacué iwàwacutá peebáidaca iyúwa cachìwéeyéi ichùullíanácué píá. ²¹Càita nacàlidaca nachìwawa cayábáanápínásacué Dios iicáca píá. Náimaca: “Picácué pidunùwa yái wawàsi ìwali; picácué piyáa yái yàacàsica; picácué peedáni picáapi irículéwa”, náimaca. ²²Macáita yái tàacáisica nacàlidacáita wawàsi ìwali imáalèeripínácawa, íná càmíta iwàwacutá wéemìaca nàasu tàacáisi irí, Dios imànicáináaté yàacàsi wayáapíná. Níara cachìwéeyéica nachùullíaca wenàiwica, néewáidaca nacái nía èeri mìnánái yàasu tàacáisi iyú. ²³Báisíta madécaná wenàiwica iyúunáidaca cáalíacáica nía cawinácaalí yeebáidéeyéica cachìwéeyéi itàacái, áibanáicáiná nayúunáidaca náalimáaná nàaca Dios icàaluíniná cayábéeri iyú cachàiniwanái náicha canánama namànicaalícaíta càulenéeri wawàsi, nàyacaalí nacái máini catúulécanéeri iyú, namàacacaalí náichawa nayáacaléwa, nàuwichàidacaalí nacái naináwa báawanama. Quéwa macáita yái canéeri iwèni wawàsica càmíta iyúudàa wía wadacùacaténá wáichawa wáiwitáise báawéerica, yái ichùulliyéerica wamànínápíná wabáyawanáwa.

3 ¹Iná pìyacáinácué abédanamata Cristo yáapicha, yái imichèericatéwa yéetácáisi íicha, íná siùca pìyacuéca picáuca wàlisài yáapichawa, càide iyúwa pidéca nacáicaalícué pimichàacawa Cristo yáapicha yéetácáisi íicha. Iná iwàwacutácué pimànica càide iyúwa Cristo ichùulianá pía peedácaténácué piríwa yái cayábéeri cawènírica iyéerica chènuniré, Cristo iyacataléca yáawinacawa Dios yéewápuwáise icùacaténá macáita Dios yáapicha. ²Píináidacuéwa ìwali yái cawèníri iyéerica chènuniré peedéeripinácuéca piríwa áibaalípiná. Picácué píináidawa mamáalàacata ìwali yái èeri iricuírica. ³Càicuéca píade iyúwa wenàiwica yéetéeyéicatéwa Cristo yáapicha. Càide iyúwa yéetéerimiwa càmfíná íináidawa quirínama èeri iricuíri ìwali, càita nacái picácué píináidawa mamáalàacata èeri yàasu wawàsi ìwali. Cristo, yái iyéerica abédanamata Dios yáapicha, icùaca iyaca picáuca càmfíri imáalàawa Dios irípiná ibàacanéeri iyú áibanái èeri mìnánái íicha. ⁴Pìyacáinácué abédanamata Cristo yáapicha, íná abéericata Cristo yái yèericuéca picáuca càmfíri imáalàawa. Aibaalípiná Cristo yàanàpiná àniwa, yásí pìyapinácué icamaláná mèlumèlúiri iricu Cristo yáapicha, picùapíná macáita Cristo yáapicha, yái iyéerica chènuniré máiníri cáimiétaquéri iyú naicáca, icùacáiná macáita.

La vida antigua y la vida nueva

⁵Aibaalípiná pìyapinácué Cristo yáapicha chènuniré, íná siùca cháí èeri iricu pimànicuécúe ùwicái cachàiníri iyú íipunita yái píiwitáise bàaluisàimica, yái ichùulièricuécúe pimànica pibáyawanáwa mamáalàacata: Picácué píimá áiba yáapicha càmfírica pinirisíwa, càmfíchúaca nacái píinusíwa. Picácué pimàni báawéeri piiná iyúwa, yái wawàsi càmfírica Dios ibatàa wenàiwica imànica. Picácué nacái pimàni càide iyúwa píiwitáise báawéeri iwàwáaná pimànica. Picácué piwàwa peedáca piríwa mamáalàacata macái wawàsi cawèníri. Cáinínacaalícué piicáca cawèníri wawàsi, yá piacuéca èeri iricuíri wawàsi icàaluíniná Dios íicha, íná pimànicuécúe càide iyúwa wenàiwica yèeyéica ídolo cuwáiná yéenáiwaná icàaluíniná Dios íicha. ⁶Cawínacaalí imàníyéica càì nàuwichàapínacawa manuíswwata áibaalípiná Dios yàasu yùuwichàacáisi caiyéininéeri yàanàpinácaalí nàwali, càmicáiná neebáida Dios itàcái. ⁷Càitécúe pimànica bàaluté píináidacáinatécúéwa ìwali yái èeri iricuírica. ⁸Quéwa siùca pimàacacuécúe píichawa macáita yái báawéerica. Picácué calúa píiwitáise, càita nacái picácué calúa pía ráunamáita. Picácué báawa piicáca áibanái. Picácué picuísa píichawa áibanái,

càita nacái picácué pitàaní nàwali báawéeri iyú. Picácué pitàaní casaquèeri tàacáisi iyú. ⁹Piwènúacatécuéwa píiwitáise bàaluisàimi íchawa, ícha nacái yái báawéerica pimàníricatécué ipíchawáiseté peebáidaca Jesucristo itàacái, íná picácué picàlida pichìwawa piríwáaca. ¹⁰Siúcade pidèniacuéca wàlisài píiwitáisewa ìyéerica càide iyúwa wàlisài wenàiwica. Yá píiwitáisecué wàlisài idàwinàacawa yàacawa Dios íiwitáise inacáiripiná, yéewanápinácué pialíacawa cayába Dios ìwali, yái Dios idàbéericatécué pía. ¹¹Weebáidacaalí Cristo itàacái, yá cayábaca Dios iicáca wía macáita abédanamata, Cristo ìwalíise, judíocaalí wía, càmiyéicaalí judío wía nacái, imàniyéicaalí circuncisión wía nacái, càmiyéicaalí imàni circuncisión nacái wía, yànèyéicaalí áiba cáli néese wía nacái, càmiyéicaalí yáalia wía nacái, áibanái yàasu wenàiwicacaalí wía nacái, íibaidéyéica mawèníri iyú, náiwacanánáicaalí wía nacái. Iyaca abéerita wawàsi iwàwacutéeri macáita wamànica: Iwàwacutá wadèniaca Wáiwacaliwa abéerita macáita, yái Cristoca. Yá nacái Cristo ìyaca wawàwalicu macáita.

¹²Cáinináca Dios iicácuéca pía. Dios idéca yeedáca pía yàasu wenàiwicacáténácué pía. Iná pìyacué machacàníri iyú. Piicácué áibanái itúulécaná báisíri iyú. Pimànicué áibanái irí cayábéeri. Picácué cachàini piicá píawawa áibanái ícha, néese iwàwacutácué piicáca áibanái iyúwa cachàiniyéica píicha. Piideniácué piùwichàanáwa matuíbanáiri iyú áibanái imànicaalícué pirí báawéeri. ¹³Aibacaalí péenácué imàni pirí báawéeri, yá pìideniácuéni, néese pimàacacué piwàwawa ícha, yái báawéerica imàníricuéca pirí. Càide iyúwa Wáiwacali imàacáanátécué iwàwawa pibáyawaná ícha, càita nacái pimàacacué piwàwawa ícha yái báawéerica áiba péená imàníricuéca pirí. ¹⁴Iyaca abéeri wawàsi cachàiníri náicha canánama, yái cáinináanaca waicáyacacawa. Cáininácaalí waicáyacacawa, yásí abédanamata wáiwitáise wáapichawáaca manuísíwata. ¹⁵Pimàacacué Cristo iyúudàaca pía pìyacaténácué matuíbanáiri iyú píapichawáaca yácáiná Dios imáidacatécué pía abédanamacáténácué píiwitáise píapichawáaca càide iyúwa Cristo iiná ìyéerica cháì èeri irícu. Píacué Dios irí cayábéeri ìwali macáita yái cayábéerica Dios imàníricuéca pirí.

¹⁶Píináidacuéwa mamáalàacata Cristo itàacái ìwali piwàwalicuésewa pialíacáténácué péemiaca manuísíwatani. Péewáidáyacacuéwa Dios yáalíacái iyú. Pichàiniadacué piwàwawáaca nacái cáalíacáiri iyú. Picántàacué cachàiníri iyú píacáténácué Dios irí cayábéeri. Picántàacué Dios irí salmos iyú, himnos iyú nacái, canciones iyú nacái, iyúwa

Espíritu Santo iyúudàanácué picántàaca. ¹⁷Càinácaalícué wawàsi pimàni, càinácaalícué nacái picàlida, pimànicué macáita Wáiwacali Jesús ípidená ìwali, píasáidacaténácué íiwitáise áibanái irí. Piacué Wáaniri Dios irí cayábéeri nacái Wáiwacali Jesús ípidená ìwali.

Deberes sociales del cristiano

¹⁸Piacué inanái caníríiyéica, peebáidacué piniri itàacáywa, yácáiná cawinácaalí inanái yeebáidéechúaca Wáiwacali itàacái iwàwacutá umànica càide iyúwa ùacawéeri ichùulianá úa. ¹⁹Piacué asianái cáinuíyéica, cáininácué piicáca pínuwa, pimànicué ulí cayábéeri. Picácué piùwichàida úa. Picácué nacái pitàaní ulí ipisiiri tàacáisi iyú.

²⁰Piacué sùmanáica, peebáidacué pisèenái itàacáywa macáita casímáicáiná Wáiwacali iicácué pimàni càì. ²¹Piacué asianái quéenibéeyéica, picácué pialimáida piicáwa péenibenáywa àta calúacataléta náiwitáise, ipíchaná achúmaca nawàwa manuísíwata, yá càmita quirínama neebáidacué pitàacái.

²²Piacué áibanái yàasu wenàiwicaca, íbaidéeyéica mawèníiri iyú píiwacali iríwa, pimànicué macáita càide iyúwa píiwacali ichùulianá pía cháí èeri irícu. Pimànicué cayábani yái píibaidacalécawa, càmfíríca abéta píiwacali iicáidacaalícué pirí, cayábacaténácáita iicácué pía meedá, néese píibaidacué cayába càiripináta píiwitáise cayábéeri yáapichawa báisiiri iyú, píasáidacaténácué piaca Dios icàaluíná. ²³Cawinácaalícué pimàni, pimànicué cayábani casímáiri iyú càide iyúwacué píibaidaca nacáicaalí Wáiwacali irí, càmfíríca wenàiwica irí meedá. ²⁴Càicué pimàni pialíacáinácuéwa Wáiwacali yàanápínácué pirí yàasu cawèníiri yéenáwa yàacaténácué piwèni áibaalípiná pìanàcaalícué chènuniré, píibaidacáinácué Cristo irípiná, yái Píiwacalisíwacué abéerita. ²⁵Quéwa cawinácaalí imàníríca íbáyawanáwa, Dios ipáyaidapínáni yùuwichàacáisi iyú, ìwalíse yái báawéerica imàníríca, càmicáiná Dios iicá áiba wenàiwica íiwitáaná iyúwa cayábéeri áibanái íicha, néese iicáca macái wenàiwica abédanamata.

4 ¹Piacué náiwacanánái iwàwacutácué picùaca piàsu wenàiwicawa machacàníiri iyú. Picácué piùwichàida nía máiwitáiséeri iyú, néese pimànicué nalí cáalíacáiri iyú. Piwàwalicué pidèniaca Píiwacaliwa chènuníiséeri. Yá áibaalípiná iwàwacutácué picàlidaca piináwanáwa irí càinácaalícué cayábéeri, báawéeri nacái pimàníríca cháí èeri irícu.

²Piacué wéenanáica, picácué piméyáawa pisutáca píawawa Dios íicha. Néese pisutácué píawawa Dios íicha manuísíwata. Yá piacué Dios irí

cayábéeri. ³Pisutácué nacái Wáiwacali ícha walípiná imàcáanápíná wacàlidaca yái cayábéeri tàacáisica áibanái irí mamáalàacata, wacàlidacaténá nacái nalí yái tàacáisi càmíricaté wenàiwica yáalía ìwali, yái tàacáisi ímérica Cristo iwasàaca càmíyeyí judío Dios yàasu yùuwichàacáisi ícha. Iná pisutácué Dios ícha nulípiná ipíchaná cáaluca núa, nùyacáiná siùca cháí presoíyeyí ibànalícu nucàlidacáiná yái tàacáisica wenàiwicanái irí. ⁴Pisutácué nulí Dios amalácaténá numànica nalí yái tàacáisica yéewanápíná náalíaca néemiacani, càinácaalí ímáaná.

⁵Piicácué píchawa cayába, pimànicué cáalíacáiri iyú, iwàwacutácaalícué pimànica wawàsi nèewi níara áibanái càmíyeyíca yeebáida Jesucristo itàacái. Càicaalínácaalícué píalímá picàlidaca nalí Wáiwacali iináwaná ìwali, yá picàlidacué nalíni. ⁶Iwàwacutácué pitàaníca éeréeri iyú càiripínáta, cáiwitáiséeri iyú nacái. Iwàwacutácué píalíaca picàlidaca machacàníiri iyú nalíni, macáita cawinácaalí wenàiwica isutéeyéica yémíawa pía.

Saludos finales

⁷Wéenàsàiri cáininéerica waicáca ípidenéerica Tíquico icàlidapínácué píriwa macáita nuináwaná. Tíquico yàacawéeridaca wía cayába, íbaidaca nacái Wáiwacali írípíná núapícha. ⁸Iná nubànùacué píataléni icàlidacaténácué píri waináwaná ichàiniadacaténácué píiwitáise Wáiwacali ìwali. ⁹Onésimo yái wéenàsàiri cáininéerica waicáca, píyacàle néeséericué nacái, yàapínácawa Tíquico yáapícha. Yásí nacàlidacué píriwa macáita ìwali càinácaalí ìyáaná cháí.

¹⁰Aristarco yái ìyéerica presoíri iyú núapícha presoíyeyí ibànalícu, iwàwalícuéca pía. Càita nacái Marcos, yái Bernabé yéenasàirináca, iwàwalícuéca pía nacái. Nudéca nucàlidacuéca píri Marcos ìwali, ipáchiacaalícué pía, yá pitàidacué cayábéeri iyúni. ¹¹Aiba wenàiwica ípidenéeri Jesús, áibaalí ípidenéeri Justo, iwàwalícuéca pía nacái. Níacata abéta judío yeebáidéeyéica Jesucristo itàacái íbaidéeyéica núapícha, wacàlidacaténá càinácaalí iyú Dios icùaca yàasu wenàiwicawa. Càita nachàiniadaca nuwàwa. ¹²Epafras abéericué píyacàle néeséeri íbaidéerica Cristo írípíná iwàwalícuéca nacái pía. Yá mamáalàacata isutácuéca Dios ícha píripínácué manuísíwata cachàinícaténácué píiwitáise Jesucristo ìwali, pimàcáanápínácué píawawa nacái Dios irí pimànicaténácué càide iyúwa Dios iwàwáaná. ¹³Núalíacawa Epafras isutácué Dios ícha píripínácué manuísíwata, càita nacái Epafras isutáca

Dios ícha nalípiná níara Laodicea iyacàlená mìnanáica, Hierápolis iyacàlená mìnanáica nacái. ¹⁴Lucas nacái yái cadepiacáirica cáininéerica waicáca, iwàwalicuéca pía nacái. Càita nacái Demas iwàwalicuéca pía.

¹⁵Nuwàwali níara wéenánáica yeebáidéeyéica Jesucristo itàacái Laodicea iyacàlená mìnanáí. Nuwàwali nacái Ninfa, nía nacái iwacáidáyaquéeyéicawa ucapèerìculé namànicaténá culto.

¹⁶Pidécanáamicué piléeca yái cuyàluta piríwáaca, yá pibànùacuéni naléecaténáni, níara yeebáidéeyéica Jesucristo itàacái, Laodicea iyacàlená mìnanáica. Píacué nacái, piléecué nacái yáara cuyàlutaca nubànuèrica nalí Laodicea néré. ¹⁷Píimacué càì Arquipo irí: “Píibaida cayába pimànicaténá píibaidacaléwa càide iyúwa Wáiwacali ichùulianá pimànica irípináni”, càì núumaca Arquipo irí.

¹⁸Núa Pablo nutànàacué pirí yái tàacáisi achúméerínaca nucáapi iyúwa nuwàwalicáinácué pía. Pisutácué Dios ícha nulípiná presocáiná núa. Nusutácué nacái Dios ícha pirípinácué imàníinápinácué pirí cayábéeri mawèníiri iyú.

